

Date – 06/05/2025

Time - 7:30 -7:40Hrs

AKASHVANI AIZAWL
REGIONAL NEWS BULLETIN
HEADLINES (MORNING)

- 1. Chief Minister Pu Lalduhoma kaihhruaiia Assam Rifles Ram Advisory Committee thukhawm chuan Sipai chhuahsan ramte chu mimal, pawl, party, NGO leh kohhran kutah lut lo se an ti.
- 2. Health Minister hlui, MNF Sr Vice President Dr R Lalthangliana chuan Mizoram Universal Health Care Scheme hnuaiah Mizoram sorkar damdawiinah te man chawi a ngai tawh a ti.
- 3. Union Home Ministry chuan civil defence lam inpuahchahna dinhmun hriat nan state thenkhat chu naktuk Nilaini hian enchhinna mock drill nei turin a ti.
- 4. Defence Minister Rajnath Singh-a leh Japan Defence Minister General Nakatani te kaihhruaiin nimin khan New Delhi-ah venhimna lama thawhdunna thlirho a ni.

<><><>

AR LAND

Chief Minister Pu Lalduhoma kaihhruaiia Assam Rifles Ram Advisory Committee thukhawm chuan Sipai chhuahsan ramte chu mimal, pawl, party, NGO leh kohhran kutah lut lo se an ti.

Assam Rifles Ram Advisory Committee thutkhawm vawi 1-na chu nimin khan neih a ni a, Advisory Committee hian AR ram chhunga ram nei mimal, pawl leh kohhran te chu an ram pass te sawrkara hlan let vek tura ngen ni se, a ti a. Ram neitu thenkhat court-a sawrkar khing mek te pawh an thubuaite hnukkir tura ngen an rel bawk.

Thutkhawmah hian AR ram chhuahsana building hrang hrang man chawi tur chu cheng vbc 5 vel a nih tur thu tarlan a ni bawk a ni.

Thutkhawmah an thu zingah hian AR chhuansan rama Mizoram Legislative Assembly Complex din tura ruahmanna a tel a, hei bakah hian Home Department atanga rawtna lut Assam Rifles Memorial din te leh INTACH, Mizoram Chapter atanga rawtna lut Assam Rifles cantonment building chu vawn that tura ruahmanna bakah UD&PA Department atanga rawtna Ropeway project siamna tura ruahmanna te leh Power and Electricity Department atanga rawtna Sub-Station dinna tur te chu sawiho a ni a,

Heng bakah hian Assam Rifles in Babutlanga ram an chhuahsan Zarkawt Veng Joint Action Committee kuta hlan te leh Mizoram Flourist’s Association atanga rawtna Flower Market emaw Show House din te leh Aizawl Hmathlir Pawl (AHP) atanga rawtna Assam Rifles chhuahsan rama Mizoram Police duty indah te leh Assembly House din bakah Laldenga Cultural & Community Centre sak tura ruahman aiah Aizawl Green Park siam zawk ni se tia rawtna te a ni.

Agenda hrang hrang awmin Mizoram Gorkha Mandir Sanchalan Samiti Bazar Area, Aizawl chuan Zodin hmuna Assam Rifles Hari Mandir awm chhunzawm ni se tiin rawtna an thlen a, mimal leh pawl hrang hrang atanga rawtna lut Biakin hmun Mizoram Synod hnena pek te leh Parking Lot siam tura hmalak bakah Bethlem Branch YMA atanga YMA Plantation siamna tura rawtna te a tel a ni.

(DESK)

<><><>

UNION MINISTER

Union Minister of State for Textile & External Affairs Pu Pabitra Margherita-a'n Mizoram chu hnamzia (culture) bakah chawhmeh atanga la leh puan thlengin a hausa hle a, kawngtin rengah hmasawn turin theihna a nei sang hle tih a sawi.

He thu hi nimina Aizawl-a thuthar thehdarhtute a kawmna ah sawiin Union Minister chuan Mizoram kawngtin rengah hmasawn turin theihna sang tak a ngah hle a ti a, Union Minister chuan inkalpawhna chu an ngaihpaawimawh ber pakhat a nih angin Mizoram chu a tum khatna atan rel kaltlangin ramchhung hmun dangte nen a inkalpawh theih tawh tur chu lawmawm a tih thu a sawi a, railway bakah kawngpui, thlawhtheihna leh tunlai thiamna hmanga khawvel hmundang nena inpawh theihna turin hmalak mek a ni a ti a, venhimna, leh hmasawwna bakah khualzin hipna, la leh puan chungchangah te pawh state sorkar leh mipuite nen an thawk ho zel dawn tih a sawi a ni. Kum 2047-a India in Ram hmasawn a nih theihna tur kawng Viksit Bharat 2047 nei thei tura sorkar laipui hmalakna hrang hrang hnuaiah Mizoram chu state hmasawn a nih ngei a beisei tih a sawi.

Minister chuan hmarchhak hnamte chu kutthemthiam leh la leh puan lamah an hausa hle tih a sawi a, Mizoramah pawh puan ze hrang hranga tah dan hrang hrang a awm tih a sawi a, hmarchhak biala hnam hrang hrang 200 chuang chengte chuan anmahni pual theuhin puan chi hrang hrang an nei a, Ministry of textile chuan abikin puantahtute tihmasawwna turin scheme a siam a, Mizoram chuan Muga Silk tharchhuak turin theihna tam tak a nei a ti a, Mizoram khawthlang lama India leh Bangladesh ramri-a Integrated Check Post leh Kawrpuichhuah khuua kawngpui siam chu a rang thei ang bera hman theih a nih tur thu a sawi bawh a ni.

Hei bakah hian Union Minister chuan DoNER Ministry NEC chu hmarchhak bial hmasawwna turin a inpumpek tih sawiin, hmasawwna tam tak thawh a ni tawh a, kar 2 dan zelah Union Minister hrang hrang chuan hmasawwna hnathawh mek chu ramchhung hmun hrang hrangah a hmunah ngei tlawhin an enpui thin tih a sawi.

Corr: Maremi

<><><>

MNF-MUHCS

Health Minister hlui, MNF Sr Vice President Dr R Lalthangliana chuan Mizoram Universal Health Care Scheme hnuaiah Mizoram sorkar damdawiinah te man chawi a ngai tawh a ti.

Dr Lalthangliana chuan nimin khan Aizawla MNF Party Office Mizo Hnam Runah Mizoram Universal Health Care Scheme chungchang hi sawiin, he scheme hi mihausa leh mirethei inthliarna dik tak a ni a, miretheite thlavang hauh a ngai a ti a, he scheme hnuaiah hian sorkar damdawiin chuan damlo an enkawlte hnen atangin, Damlo inenkawlna an bill dawn avangin Govt. Hospital zawng zawng chu PAYING HOSPITAL ah an siam dawn tihna a ni a ti.

Mizoram Universal Healthcare System leh AB-PMJAY te chu scheme thuhmun leh a kal phung leh Healthcare Bill dan pawh in ang, a hming chiah hrang a ni a, MUHCS Scheme pawh Package system a duan a ni a ti a. He scheme hnuaiah hian Dam lo ten an damlohna a zira rate siamsa package an lak ang chauh Damdawiin atang in an bill sak thei dawn a, a bak zawng senso chu Damlo in a pek belh a ngai dawn tih sawiin, hei hi Private Hospital leh Sorkar hnathawk inzawmkhawm pawl (FMGE &W) ho te pawh in an zawm duh loh chhan a ni a ti a. MUHCS package rate te hi Private Hospital rate te nen a han khaikhin hian a rate a in thlau hle a ti bawh.

Private Hospital ten MUHCS an zawm duh loh chuan mipui rethei ho in an tuar ber dawn tih sawiin Sorkar Hospital a damlo in enkawlna te Healthcare Bill atanga an re-imburse te chu enga hman tur nge tih hriat a chakawm thu sawiin ZPM sawrkar chuan Mipui damlohna chu sum hmuh nan hman a lo tum reng tihna a ni thei a ti.

Dr Lalthangliana chuan, Sorkar hnathawkten an damloha an inenkawlna senso an bill ang ang chu sorkar in a re-imburse sak mai a, an hlawhah emaw a cut sak ngai lo a, hetianga an dikna chanvo sorkarin a pal zut sak leh rawn derna pawh awm lova an thla hlawh atanga Mizoram Universal Healthcare Scheme a tan pawisa cut-na tur thu a ti thlu ngawt hi in zah lohna leh in tham lohna lian takah MNF party chuan a ngai tak zet a ni, a ti.

MUHCS Guidelines-a awm Mipui hriat tur mahse; sorkarin a thup a awm tih sawi bawkin Health Minister hlui chuan Aizawl Civil Hospital leh Zoram Medical College and Hospital-ah Emergency Case bakah khum a awm loh hun atan private damdawiina enkawl tura Emergency Certificate hmang a damloten MR an Bill theihna tur dan a awm thu chu thup a ni a ti a, he thil hi a serious tak zet a ni tih sawiin, Sorkar hian damlo tanpui nge a tum a tlem thei ang ber Bill tir tih chu an thil puanzar loh hian a ngaihtuah tir tih Dr R Lalthangliana chuan a sawi a ni.

(Corr)

<><><>

Mizoram Board of School Education chuan vawiin chhun dar 12:00 hian Higher Secondary School Leaving Certificate Exam result a tichhuak dawn.

Thuchhuah tarlan danin Pawl 12 Result hi MBSE Office Chaltlangah leh heng website – (a) www.mbse.edu.in (b) www.mbseonline.com–ah te en theih a ni dawn a, A mamawh tan result bu lei theihin a awm bawk ang.

(DESK)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MOCK DRILL

Union Home Ministry chuan civil defence lam inpuahchahna dinhmun hriat nan state thenkhat chu naktuk Nilaini hian enchhinna mock drill nei turin a ti. Thudawn danin indo thlawhnaa inbeih thula inralinna Air Raid Sirens hman dan turte leh civil mite leh zirlaite tan hmelma te beihna thlen thula mahni inralin leh inven dan turte enchhian a ni ang. Hei bakah hian indo thlen thulha harsatna thleng thei hrang hrang kawlphehta chhia avanga buaina leh hmun pawimawh hum dan turte leh insaseng dan turte pawh enchhin a ni dawn bawk a ni. He mock drill hi ramchhunga indo leh harsatna liantham thlen thula mipuite lo inbuatsaih lawk theihna tura duan a ni.

(Newsonair)

<><><>

RUSSIA PRESIDENT

Russian President Vladimir Putin chuan vawiin khan Prime Minister Narendra Modia biain Pahalgam-a firfiaka chetna chu na taka a dem thu a sawi. Telephone hmanga an inbiaknaah hian President Putina chuan pawisawi loten nunna hlu tak an chan chu pawl a tih thu sawiin India-in firfiakte a do na kawngah Russia chuan theihtawpin a thlawp dawn tih a sawi a. He inbeihna rapthlak taka mawhpurtute leh anmahni puitute chungah hremna na tak pek ngei anih tur thu a sawi bawk.

External Affairs Ministry thupuangtu Randhir Jaiswal chuan hruaitu pahnihte inbiaknaah hian India leh Russia te inlaichinna ti nghet lehzuat tura an inrem thu a sawi a. Prime Minister Narendra Modia pawhin Russia-in Victory Day vawi 80-na a thlen turah duhsakna hlanin kumtawpa Annual Summit an neih turah lo tel turin a sawm nghal bawk a ni

(Newsonair)

<><><>

DEFENCE MINISTER

Defence Minister Rajnath Singh-a leh Japan Defence Minister General Nakatani te kaihhruaiin nimin khan New Delhi-ah venhimna lama thawhdunna thlirho a ni a. Defence Minister Rajnath Singh-a chuan Pahalgam firfiaka chetna thlen hnu lawka Japan sawrkarin India a thlawp thu a sawi chu lawmthu a hrilh a. Defence lama ram pahnihte thawhdunnaah General Nakatani hmalakna zawng zawngah lawmthu a sawi a ni.

Ram hruaitu pahnihte hian an venhimna chungchanga an ngaihndan leh thlirna hrang hrangte an sawidun a ni.

(Newsonair)

<><><>